

POLITICA E ISTITUZIONI/1

## Prest l Comun general tel Consei de la Autonomies

*La Pruma Comiscion legislativa à tout dant l ddl 79 del conseier Luca Guglielmi, prum di vèrsc domané dal procurador Giuseppe Detomas acioche, dò l recognosciment costituzionèl, chest ent vegne disciplinà da la PAT*

Chisc dis passé, avisa en mercol ai 17 de firé, la Pruma Comiscion Legislativa de la Provinzia Autonoma de Trent à tout dant con l'audizion del Consei de la Autonomies Locales de la Provinzia, l desegn de lege nr 79 portà dant dal conseier provinzièl ladin Luca Guglielmi ai 23 de november del 2020, che domana de mudèr l'articol 2 de la Lege provinzièla nr 7 del 2005 che à metù sù l CAL, a na vida che l Procurador del Comun General de Fascia o n si delegà posse tor pèrt a chest organism che perveit la partezipazion di enc locai a la sceltes de carater istituzionèl, a l'atività legislativa e amministrativa de la Provinzia de Trent.

### La discusion te la Pruma Comiscion Legislativa

L ddl 79 dai 23 de november 2020 era jà stat tout dant da la Pruma Comiscion legislativa de la Provinzia, vidèda da Vanessa Masè, ai 9 de firé. Te chela ocasion l procurador del Comun general de Fascia Giuseppe Detomas à recordà la storia del Comun general, sottrissan che chest ent no l'è na scempia Comunità de Val ma del 2017 l'è doventà n ent local recognosciù a nivel costituzionèl.

Duc i consieeres se à palesà a favor de chest ddl e ence l president de l'Autorità per la mendranzes linguistiches Dario Pallaoro e l president e l vizepresident de l'Union di Ladins de Fascia, Fernando Brunel e Stefano Weiss, che é stac envié a se palesèr sul ddl, i à sostegnù l besegn che l vegne aproà.

La Pruma Comiscion se à binà apontin amò n'outa en mercol ai 17 de firé, canche chest sfòj era jà en stampa, per l'audizion con l CAL,



L conseier provinzièl ladin Luca Guglielmi.

e l'è da pissèr che ence te chest organism l provèdiment sie stat valutà positivamenter e che l posse jir bele prest en aula per l'aproazion, pervèduda fosc amò per l meis de mèrz.

### L besegn de meter man a la normes

Chest desegn de lege é nasciù dal besegn de pervèder endò la prezenza del Comun general tel CAL. Defat dal 2010, canche l'era nasciù, l Comun general era raprejentà te chest Consei, ma dapò l'è vegnù fora l problem per n recors contra la Comunitàdes de Val con orghegn litè, conscidré fora norma ajache chesta Comunitàdes no é pervèduda da l'articol 114 de la Costituzione taliana, che disc chiaramente coluns che l'è i enc locai recognosciui. Chest à portà la Provinzia de Trent a tor demez chisc enc intermediaries del 2014 con la reforma Daldoss. Ampò enlouta l Comun general aea tegnù dur contra sia abolizion e del 2017, su spenta de l'avocat e enlouta



L Procurador Giuseppe Detomas ge à consegnà la petizion, sotescrita ence da duc i ombolc de Fascia, al president del Consei provinzièl Walter Kaswalder.

conseier provinzièl ladin Giuseppe Detomas, te la lege costituzionèla nr 1 dai 4 de dezember (cognosciuda desche lege Alfreider), che à aproà vèlch mudament al Statut de autonomia del Trentin Sudtirol, l'è stat metù ite n coma aposta per recognoscer ofizialmenter al maor nivel l'ent soracomunèl fascian, schivan cuscita ogne risech che l Comun general posse vegnir tout demez. Donca ades l'è stat endò metù dant l besegn de pervèder sia raprejentanza tel CAL.

### Detomas: »Chest l'è demò l prum vèrch«

La domana de la raprejentanza del CGF tel CAL l'è un di ponts domané da Detomas, ades Procurador, te la petizion populèra nr 10, sotescrita ence da duc i ombolc de Fascia e consegnèda dal Procurador ai 23 de november del 2020 al president del Consei provinzièl Walter Kaswalder a la prezenza del conseier

ladin Luca Guglielmi, che apontin tel medemo di l'è prejentà l ddl 79 per vardèr de comedèr chesta mencianza che da egn chieria na soluzion.

Chest l'è ampò demò un di ponts domané te la petizion, che auza fora l besegn che l Consei provinzièl tole dant la costion del Comun general de Fascia a na vida più globala te l'ordenamènt di enc locai.

»Dò l recognosciment a nivel costituzionèl – deschiarsc Detomas – l Comun general l'è doventà n ent unich tel sistem istituzionèl talian, desferent da chel che era stat pervèdù da l'articol 19 de la Lege Provinzièla nr 3 del 2006 sul goern de le autonomie del Trentin. Ades l'è n ent local recognosciù a duc i efec desché chi pervèdud da l'articol 114 de la Costituzione taliana, che l'è i Comuns, le Provinzie, le Zitè metropolitan, le Region e l Stat; no l'è demò na Comunità de Val metuda sù da na lege provinzièla e donca ge vel che dut vegne disciplinà



L procurador del Comun general de Fascia Giuseppe Detomas.

aldò, tel respet de l'ordenamènt di enc locai, ence per schivar problemes de competenze anter Region e Provinzia.»

Anter i etres vèrsc domané per ruèr al pien recognosciment del Comun general, per cont de Detomas cognarà dapò ence vegnir formalisà na Comiscion paritetica per tor dant i passajes de competenze anter la Provinzia e l Comun general.

»I raporc anter i enc recognosciui a nivel istituzionèl – disc Detomas – no pel esser fac fora da n desch de lurier metù sù con delibera de Jonta, descheche, ge vel na Comiscion, su la sort de chela di 6 per le competenze anter Stat e Provinzia, ajache a nivel giuridich chisc raporc cogn vegnir definii da na lege amancol del medemo nivel. Gio é jà proponet che vegn fat na norma de atuazion de chest vers – sera sù l Procurador del Comun general – e son dò che spete na resposta.»

Lucia Gross